



DOMOWINA

WUSTAWKI

Domowina – Zwjazk Łužiskich Serbow z.t.

wobzamknjene dnja 03.06.2022 w Chóšebuzu

Art. 1

Mjeno, symbolika, sydło a městno sudnistwa

- (1) Towarstwo mjenuje so Domowina – Zwjazk Łužiskich Serbow z.t./ Zwězk Łužyskich Serbow z.t. (dale: Domowina).
- (2) Znamjo Domowiny pokazuje na čerwjonym pozadku tři slěborne lipowe łopješka, kotrež wurostuja ze zdónka z wosom korjenjemi.
Domowina wužiwa a škita serbsku chorhoj módro-čerwjeno-běłu.
- (3) Sydło a městno sudnistwa Domowiny je Budyšin.
- (4) Domowina je do registra towarstwow zapisana.

Art. 2

Zaměr a nadawki

- (1) Domowina je politisce njewotwisny a samostatny zwjazk Serbow a třěšny zwjazk serbskich towarstwow Delnjeje a Hornjeje Łužicy. Wona je zastupjerka zajimow serbskeho ludu a skutkuje předewšěm w serbskim sydlenkim teritoriju Kraja Braniborska a Swobodneho stata Sakska. Wona je w kontinuiće prawniske naslědnica Domowiny – Zwjazka Łužiskich Serbow. Domowina wuznawa so k swobodnemu demokratiskemu zakładnemu porjadem w Zwjazkowej republice Němska.
- (2) Domowina ma slědowace zaměry:
 - zasadžeć so za zachowanje a wuwijanje, spěchowanje a šěrjenje rěče a kultury a tradicijow serbskeho ludu, narodneho wědomja, zhromadnosće Serbow a zwjazanosće z domiznu,
 - zjednoćeć a podpěrować Serbow a serbske towarstwa w jich narodnym dźěle,
 - zastupować serbske narodne, hospodarske a socialne zajimy w zjawnosći, napřečo parlamentam, institucijam a zarjadam na komunalnej, wokrjesnej, krajowej, zwjazkowej a mjezynarodnej runinje,
 - zasadžeć so za prawniske rjadowanje škita a spěchowanja narodnych mjeńšin w Němskej a za dodžerženje wotpowědnych zakonskich postajenjow a mjezynarodnych dojednanjow,
 - spěchować tolerancu a zrozumjenje mjez serbskim a němskim ludom a jeje runostajenje,
 - wudžeržować přećelske zwiski k słowjanskim ludam, k narodnym mjeńšinam a mjezynarodnym zjednoćenstwam narodnych mjeńšin a solidarnje zastupować zhromadne zajimy.
- (3) K zwoprawdženju svojich zaměrow a nadawkow ma so Domowina po wot hlowneje zhromadźizny schwalenym programje a dźěłowych směrnicach.
- (4) Wona móže być z nošerjom institucijow.

- (5) Domowina skutkuje bjez dobytk a zastupuje resp. wukonja bjez wuwzaća a njeposřednje powšitkowno-wužitne zaměry a nadawki w zmysle wotrězka “dawki znižowace zaměry” porjada wotedawkow. Wona nima přěnjotnje swójsko-hospodarske zajimy.
- (6) Předsyda a městopředsydaj wukonjeja swoju funkciju zasadnje čestnohamtsce. Po potrjebje móža so funkcije w ramiku hospodarskich móžnosćow a na zakładže zrěčenja plaćić abo z plaćenjom narunanja po § 3 čisło 26a EStG wukonjeć. Rozsud wo plaćenju funkcijow leži pola zwjazkowego předsydstwa, kotryž tež wobsahi a wuměńjenja zrěčenjow schwali. Wysokosće a wobjim plaćenja a narunanja rjaduja so w finančnym porjedže Domowiny, kiž njeje z wobstatkom tutych wustawkow.

Art. 3

Čłonstwo

- (1) Čłonojo Domowiny móža być přirodne a juristiske wosoby, prawokmane a njeprawokmane serbske towarstwa, župy, zjednoćenstwa, drustwa a zhromadženstwa (w dalšim towarstwa), kotrež wustawki Domowiny připóznawaja. Z přirodnym čłonom Domowiny je kóždy sobustaw Domowinje přislušacych towarstwow.
- (2) Próstwa towarstwa a přirodneje wosoby wo přistup k Domowinje jako třěšnemu zwjazkej ma so pisomnje zwjazkowemu předsydstwu zapodać. Towarstwo ma swoje wustawki předpožić.
- (3) Towarstwa Serbow zwonka Łužicy a we wukraju resp. towarstwa přećelow Serbow smědža jako asociěrowani čłonojo přistupić. Formy zhromadneho skutkowanja rjaduja dojednanja, kotrež sej přińhosowanje zwjazkowego předsydstwa žadaja.
- (4) Spěchowacy čłonojo Domowiny móža być přirodne a juristiske wosoby, kiž skutkowanje Domowiny spěchuja. Woni njejsu čłonojo Domowiny w zmysle porjada wotedawkow a nimaja žane hłosowanske prawo.
- (5) Čestni čłonojo Domowiny móža być zaslužbni tu- a wukrajni spěchowarjo Domowiny abo serbskeho ludu. Spožčenje čestneho čłonstwa rjaduje porjad, kiž njeje z wobstatkom tutych wustawkow.
- (6) Přistup towarstwa schwali hłowna zhromadźizna. Zwjazkowe předsydstwo přijimuje towarstwa nachwilnje do Domowiny. Wo přistupje jednotliwca rozsudži zwjazkowe předsydstwo.
- (7) Čłonstwo so skónči:
 - z pisomnym wupowědženjom towarstwa resp. čłona samoho napřećo zwjazkowemu předsydstwu,
 - z rozpušćenjom towarstwa,
 - z próstwu wo insolwencu towarstwa,
 - ze smjerću přirodneje wosoby,
 - z wuzamknjenjom při hrubym škodowanju Domowiny. Wuzamknjenje wobzamkne hłowna zhromadźizna z třomi štwórcinami wšitkich hłosow přitomnych hłosakmanych.

Art. 4

Župy

- (1) Župy su na region wjazane sobustawske towarstwa Domowiny. Wone zastupuja narodne zajimy Serbow swojeho teritorija před zjawnymi zarjadami a gremijemi.
- (2) Župy jednoća, koordinuja a spěchuja narodne skutkowanje w župnym teritoriju a prócuja so wo wzajomne džěło ze specifiskimi towarstwami.
- (3) Župy wutworja so z Domowinskich skupin, towarstwow, zjednoćenstwow a jednotliwcow. Njeprawokmane towarstwa a skupiny džěłaja wobsahowje a financielnje samostatnje a w swójskej zamołwitosći na zakładže tutych wustawkow a dalšich porjadow Domowiny, kotrež njejsu z wobstatkom tutych wustawkow.

Art. 5

Specifiske towarstwa

- (1) Specifiske towarstwa skutkuja nadregionalnje.
- (2) Wone přewozmu we wobłuku Domowiny specifiske nadawki a prócuja so wo wzajomne džěło ze župami.
- (3) Wosoby-jednotliwcy zwonka sydlenskeho ruma Serbow, kotřiž njejsu z člonom jedneje župy abo Domowinje přisłušaceho towarstwa, móža "Zjednoćenstwo přirodnych člonow Domowiny" wutworić.

Art. 6

Organy Domowiny

- (1) Naležnosće Domowiny rjaduja slědowace organy:
 - hłowna zhromadźizna,
 - k zastupowanju woprawnjene předsydstwo po § 26 Byrgarskeho zakonika,
 - zwjazkowe předsydstwo,
 - prezidij,
 - rewizijny wuběrk,
 - změrcowski wuběrk.
- (2) Prawa a winowatosće organow su w naslědnych artiklach wopisane.
- (3) Wolene organy su kmane k wobzamknjenju, jeli je wjace hač połojca člonow wotpowědneho organa přitomna. Namjet je přiwzaty, hdyž je wjetšina přitomnych hłosakmanych za namjet hłosowała, dalokož njeje to we wustawkach hinak postajene.
- (4) Organy móža tež po pisomnym puću rozsudy tworić. Namjet je přiwzaty, hdyž je so znajmjeńša połojca člonow organa na wothłosowanju wobdžěliła a wjetšina hłosakmanych za namjet hłosowała, chibazo wustawki něšto drugeho postajeja.
- (5) Organy Domowiny džělaja po swojim jednanskim porjedže. Jednanska rěč je serbsčina. Woprawnjene wuwzaća su móžne. Jednanske porjady organow Domowiny njejsu z wobstatkom tutech wustawkow.
- (6) Zhromadźizny přewjedu so pak realnje, po elektroniskim puću (na přikład přez telefon abo widejowu konferencu) abo w měšanej formje z přitomnymi kaž tež z wobdžělnikami přez widejowu konferencu, druge medije abo telefon.
- (7) Wobdžělenje na widejowej konferency, přez druge medije abo telefon je jenož z legitimaciskimi a přistupnymi datami móžne, kotrež za wotpowědnu zhromadźiznu plaća. Daty so we wosebitej mejlce sčasom do zhromadźizny sposrědkuja.

Art. 7

Hłowna zhromadźizna Domowiny

- (1) Najwyši organ Domowiny je hłowna zhromadźizna, kotraž so kóždy druge lěto schadźuje. Zwjazkowe předsydstwo zwoła hłownu zhromadźiznu znajmjeńša 3 měsacy do toho a namjetuje dnjowy porjad.
- (2) Delegaća hłowneje zhromadźizny su člonjo zwjazkoweho předsydstwa a dalši člonjo sobustawskich towarstwow. Kluč delegatow postaji zwjazkowe předsydstwo. Pisomne přeprašenja hłowneje zhromadźizny z nachwilnym dnjowym porjadom rozdžěla so delegatam znajmjeńša tři tydženje do toho.
- (3) Člonjo rewizijneho a změrcowskeho wuběrka maja prawo, so na hłownej zhromadźiznje z poradžowacym hłosom wobdžělić, jeli njejsu z delegatom.

- (4) Čłonojo Serbskeju radow při krajnymaj sejmomaj Braniborskeje a Sakskeje, serbscy čłonojo mjeńšinoweje rady kaž tež serbscy čłonojo rady Założby za serbski lud maja prawo, so z poradźowacym hłosom na hłownej zhromadźiznje wobdźělić.
- (5) Hłowna zhromadźizna srjedź wólbneje doby ma nadawk, dwulětnu dźěławosć bilancować a dźěłowe směrnicy za přichodnej dvě lěće konkretizować.
Wosebje ma wona:
- přijimać a schwalić rozprawu zwjazkowego předsydstwa wo skutkowanju Domowiny za polěpšenje položnja serbskeho ludu a zwoprawdženju nadawkow dźěłowych směrnicow,
 - přijimać a schwalić dwulětnu financnu rozprawu,
 - přijimać rozprawu rewizijnego wuběrka,
 - přijimać rozprawu změrcowskeho wuběrka,
 - diskutować a rozsudzić zasadne strategiske prašenja narodneho dźěła,
 - schwalić wólbny porjad, kiž njeje z wobstatkom tutych wustawkow,
 - schwalić porjad za spožčenje čestneho člonstwa, kiž njeje z wobstatkom tutych wustawkow,
 - schwalić přinoškowy porjad, kiž njeje z wobstatkom tutych wustawkow,
 - wobzamknýć program Domowiny,
 - wobzamknýć změny wustawkow,
 - wobzamknýć dźěłowe směrnicy za dobu hač do přichodnej hłownej zhromadźizny,
 - přijimać doskónčnje towarstwa do Domowiny.
- (6) Kóždy štwórté lěto je hłowna zhromadźizna zdobom wólbna zhromadźizna. Wona ma k hłownej zhromadźiznje slědowace přidatne nadawki:
- wuwjazać dotalne zwjazkowe předsydstwo,
 - wolić předsydu a městopředsydow Domowiny, wobkedźbować ma so při tym, zo staj tu Delnja a Hornja Łužica zastupjenej,
 - wolić dalšich čłonow zwjazkowego předsydstwa Domowiny,
 - wolić rewizijny wuběrk,
 - wolić změrcowski wuběrk.
- (7) Wo wobzamknjenjach hłownej zhromadźizny zhotowi so protokol, kotryž mataj nawoda zhromadźizny a protokolant podpisać.
- (8) Hłowna zhromadźizna je zjawna. Wuwzaća móže hłowna zhromadźizna wobzamknýć.
- (9) Wurjadnu hłownu zhromadźiznu zwoła zwjazkowe předsydstwo abo předsyda na požadanje znajmjeńša třeciny sobustawskich towarstwow. Wona ma so w běhu třoch měsacow přewjesć.

Art. 8

K zastupowanju woprawnjene předsydstwo w juristiskim zmysle a wosebići zastupjerjo

- (1) K zastupowanju woprawnjene předsydstwo w zmysle § 26 Byrgarskeho zakonika zestaja so z předsydy, hłowneho jednaćela, jednaćela a je-li trjeba z dalšich čłonow, kotrychž zwjazkowe předsydstwo powoła. Kóždy z nich ma prawo, Domowinu juristisce samostatnje zastupować.
- (2) Předsydu powołuje hłowna zhromadźizna. Hłowneho jednaćela a jednaćela powołuje zwjazkowe předsydstwo.
- (3) Zwjazkowe předsydstwo móže powołać nawodow institucijow a wotrjadow, kotrež su w nošerstwje Domowiny, jako wosebitych zastupjerjow w zmysle § 30 Byrgarskeho zakonika. Powołanje plaći za wšitke hospodarske, zarjadniske a personalne naležnosće institucijow abo wotrjada, kotrež woni nawjeduja, jeli tute wustawki ničo napřečiwneho njepostaja. Wosebići zastupjerjo su w nutřkownym poměrje wjazani na přikazy k zastupowanju woprawnjeneho předsydstwa, do zjawnosće móža samostatnje jednać.

Art. 9

Zestawa a nadawki Zwjazkowego předsydstwa Domowiny

- (1) Zwjazkowe předsydstwo ma hač do 30 člonow. Wólbna doba traje štyri lěta.
- (2) Předsyda a městopředsydaj su člonoj zwjazkowego předsydstwa.
- (3) Hłowny jednaćel a jednaćel wobdźělataj so z poradźowacym hłosom na posedženjach zwjazkowego předsydstwa. Předsyda rewizijneho wuběrka kaž tež předsyda změrcowskeho wuběrka mataj prawo, so z poradźowacym hłosom na wuradźowanjach wobdźeleć.
- (4) Wo wotwołanju člona zwjazkowego předsydstwa z wólbneje funkcije rozsudži po doporučenju změrcowskeho wuběrka na namjet zwjazkowego předsydstwa hlowna zhromadźizna. Wo přikazanym nachwilnym wotpočowanju funkcije člona rozsudži na zakładže doporučenja změrcowskeho wuběrka zwjazkowe předsydstwo; do toho wobchowa potrjecheny swoje člonske prawa.
- (5) Wo přiwzaću nachwilneho złoženja wólbneje funkcije na zakładže podaća swójskeje wole rozsudži zwjazkowe předsydstwo.
- (6) Zwjazkowe předsydstwo ma slědowace nadawki:
 - a. rozsudźeć wo prašenjach běžneho dźěla Domowiny mjez hlownymaj zhromadźiznomaj,
 - b. postajeć ćežišća dźělawasće a rjadować zawjazowace zamołwitosće za zwoprawdženje nadawkow,
 - c. přijimać prawidlownje rozprawy předsydy a prezidija Domowiny,
 - d. postajeć zamołwitosće a nadawki prezidija,
 - e. rjadować wobsydstwo a financy Domowiny,
 - f. přijimać a schwalić financne a hospodarske plany a rozprawy,
 - g. wutworić dźělowe wuběrki,
 - h. přijimać rozprawy hlowneho jednaćela wo dźěle zarjada Domowiny a postajić ćežišća dźěla zarjada,
 - i. postajeć ćežišća dźělawasće Domowinje přislušacych institucijow a wotrjadow,
 - j. přijimować rozprawy nawodow Domowinje přislušacych institucijow a wotrjadow,
 - k. nachwilnje přijimać nowe towarstwa do Domowiny,
 - l. nachwilnje rozsudzić wo nošerstwach dalšich institucijow abo wotrjadow pod třěchu Domowiny,
 - m. powołać a wotwołać resp. nominować zastupjerjow Serbow do/z gremijow a přijimać prawidlownje rozprawy wo jich dźělawasći,
 - n. wobzamknýć dźělowe porjady Domowinskeho zarjada a Domowinje přislušacych institucijow a wotrjadow,
 - o. powołać a wotwołać nawodow Domowinje přislušacych institucijow a wotrjadow,
 - p. powołać a wotwołać hlowneho jednaćela a jednaćela Domowiny,
 - q. wobzamknýć wuznamjenjenske porjady Domowiny, kiž njejsu z wobstatkom tutych wustawkow, a wolić člonow mytowanskeho wuběrka.
- (7) Zwjazkowe předsydstwo schadźuje so prawidlownje, znajmjeńša štyri króć wob lěto. Po žadanju znajmjeńša štwórciny člonow zwjazkowego předsydstwa, třoch towarstwow abo prezidija ma so wurjadne posedženje zwolać a w běhu dweju tydženjow přewjesć.
- (8) Zwjazkowe předsydstwo dźěla po jednanskim porjedže, kiž sej wone postaji. Wuradźowanja zwjazkowego předsydstwa su zjawne. Wuwzaća zwjazkowe předsydstwo wobzamkne. Jednanski porjad zwjazkowego předsydstwa njeje z wobstatkom tutych wustawkow.

Art. 10

Prezidij

- (1) Do prezidija slušeja předsyda Domowiny, městopředsydaj Domowiny a dalšej člonaj zwjazkowneho předsydstwa, kotrejuž na namjet předsydy zwjazkowneho předsydstwa powoła. Wo wotwołanju wotpowědneju člonow smě zwjazkowneho předsydstwa rozsudzić.
- (2) Prezidij schadźuje so prawidłownje, znajmjeńša dźesać króć wob lěto a dźěla na zakładze swójskeho jednanskeho porjada, kotryž zwjazkowneho předsydstwa schwali. Jednanski porjad prezidija njeje z wobstatkom tutych wustawkow.
- (3) Prezidij poradźuje předsydu a přihotuje posedženja zwjazkowneho předsydstwa.
- (4) Dalše nadawki přidźěla jemu zwjazkowneho předsydstwa.

Art. 11

Nadawki předsydy a městopředsydow

- (1) Předsyda a městopředsydaj reprezentuja Domowinu w zjawnosći.
- (2) Předsyda ma slědowace nadawki:
 - a. koordinować a nawjedować dźěło k zwoprawdženju programa Domowiny, dźělowych směrnicy, wobzamknjenjow hlowneje zhromadźizny a zwjazkowneho předsydstwa z pomocu Domowinskeho zarjada,
 - b. zwołać a nawjedować wuradźowanja zwjazkowneho předsydstwa a prezidija,
 - c. znajmjeńša lětnje jónu zwołać a nawjedować wuradźowanja z nawodami serbskich institucijow,
 - d. znajmjeńša lětnje jónu zwołać a nawjedować wuradźowanje z předsydami přislušnych towarstwow. Po žadanju znajmjeńša položcy předsydow přislušnych towarstwow ma wón zwołać wurjadne posedženje předsydow přislušnych towarstwow,
 - e. přewjesć prawidłownu koordinaciju z hlownym jednaćelom a z nawodami Domowinje přislušnych institucijow a wotrjadow,
 - f. hlownemu jednaćelej sopsrědkować nadawki z wobzamknjenjow wolenych organow Domowiny a jich zwoprawdženje w zarjedze kontrolować,
 - g. skutkować jako bjezposrědny předstajeny jednaćela Domowiny a nawodow Domowinje přislušnych institucijow.
- (3) Městopředsydaj podpěrujetaj dźěło předsydy a zastupujetaj jeho w padže njepřitomnosće.

Art. 12

Zestawa a nadawki rewizijneho wuběrka

- (1) Rewizijny wuběrk wobsteji z 5 člonow a woli so na wólbnej hlownej zhromadźiznje. Rewizijny wuběrk woli swojeho předsydu ze swojich rjadow. Wuběrk dźěla po swojim jednanskim porjedze, kiž njeje z wobstatkom tutych wustawkow. Přistajeni Domowiny njemóža być z člonom rewizijneho wuběrka.
- (2) Rewizijny wuběrk přepruwuje prawidłownje, znajmjeńša lětnje jónu wužiwanje wobsydstwa a financow Domowiny kaž tež jich porjadne knihowanje. Rewizijny wuběrk předpožiji rozprawu hlownej zhromadźiznje.

Art. 13

Zestawa a nadawki změrcowskeho wuběrka

- (1) Změrcowski wuběrk wobsteji z 5 člonow a woli so na wólbnej hlownej zhromadźiznje. Změrcowski wuběrk woli swojeho předsydu ze swojich rjadow. Wuběrk dźěla po płaciwym změrcowskim porjedze, kiž njeje z wobstatkom tutych wustawkow. Přistajeni Domowiny kaž tež člonowo zwjazkowneho předsydstwa abo druhich organow Domowiny njemóža być z člonom změrcowskeho wuběrka.

- (2) Změrcowski wuběrk přepruwuje na próstwu gremija třěšneho zwjazka, sobustawskeho towarstwa abo jednotliwego čłona konfliktnje pady w dźěławosći Domowiny, zranjenja programa, wustawkow kaž tež wobzamknjenja hłownje zhromadźizny abo zwjazkowego předsydstwa.
- (3) Změrcowski wuběrk předpołóži hłownej zhromadźiznje resp. zwjazkowemu předsydstwu namjet za změrowanje konflikta.

Art 14.

Domowinski zarjad a jeho wotrjady

- (1) Zarjad Domowiny rjaduje po wothłosowanju z předsydu zwoprawdźenje wobzamknjenjow hłownje zhromadźizny a zwjazkowego předsydstwa a podpěra dźěło sobustawskich towarstwow na zakładze zrěčenjow.
- (2) Zestawu a nadawki zarjada Domowiny kaž tež Domowinje přislušacych institucijow rjaduja dźěłowe porjady, kiž ma zwjazkowe předsydstwo schwalić. Dźěłowe porjady njejsu wobstatk tutech wustawkow.
- (3) Hłowny jednaćel nawjeduje Domowinski zarjad a jeho wotrjady.
- (4) Jeli njeje hłowny jednaćel přítomny, zastupuje jeho jednaćel.
- (5) Hłowny jednaćel a jednaćel powołataj so na dobu 7 lět wot zwjazkowego předsydstwa. Jedyn wot wobeju ma swoje dźěłowe městno w Delnjeje Łužicy a nawjeduje tamny zarjad Domowiny.

Art. 15

Financy a wobsydstwo Domowiny

- (1) Financy a wobsydstwo Domowiny smědža so jenož k spjelnjenju Domowinskih zaměrow, kaž su wone we wustawkach zapisane, wužiwać. Žana wosoba njesmě lěpšiny měć přez njepoměrnje wysoke zarunanje abo přez wudawki, kiž su zaměrej Domowiny cuze. Čłonojo-jednotliwcy njedóstanu ze srědkow Domowiny žane přiražki.
- (2) Wobchodne lěto je kalendariske lěto.
- (3) Wužiwanje financow rjaduje so po financnym porjedže Domowiny, kiž njeje z wobstatkom tutech wustawkow.
- (4) Domowina financuje so:
 - a. z přidželenjow,
 - b. z dochodow ze zarjadowanjow,
 - c. ze zběrkow a dalších dochodow,
 - d. z darow,
 - e. z poplatkow,
 - f. z přinoškow čłonow-jednotliwcow,
 - g. z přinoškow župow a sobustawskich towarstwow/zwjazkow za zhromadne předewzaća Domowiny.

Wysokosć přinoškow postaja so přez hłownu zhromadźiznu.

Art. 16

Změnjenje wustawkow

- (1) Wustawki smě jenož Hłowna zhromadźizna Domowiny změnić. K tomu stej dvě třěćinje hłosow přítomnych delegatow trěbnej.

Art. 17

Rozpušćenje towarstwa

- (1) Rozpušćenje Domowiny móže jenož k tutomu zaměrej zwołana hłowna zhromadźizna ze znajmjeńša třomi štwórcinami hłosow wolenych delegatow wobzamknyć.
- (2) Při rozpušćenju abo při zběhnjenju Domowiny – Zwjazka Łužiskich Serbow z. t. abo při wotpadnjenju dawki nižowacych zaměrow připadnje jeje zamóženje juristickej wosobje zjawneho prawa abo druhej dawki nižowacej korporaciji k wužiwanju za zachowanje a wuwijanje serbskeje rěče a kultury.
- (3) Serbski dom w Budyšinje přeńdže do wobsydstwa Maćicy Serbskeje z.t. resp. jeje naslědnicy, kiž ma jón jako powšitkowno-wužitne towarstwo w zmysle zaměrow k spěchowanju serbskeje rěče a kultury kaž tež serbskeho towarstwoweho žiwjenja wužiwać, kotrež su w artiklu 2, wotstawk 2 tutych wustawkow naspomnjene.

Za lěpšu čitajomnosć so runočasne mjenowanje muskeje, žónskeje a diwersneje formy (m / ž / d) njewužiwa. Wšitke pomjenowanja funkcijow plaća runohódnje za wšitke splahi.